

光绪辛巳续修谱序

昔晋摯虞宋何承天唐姚士廉辈于天下姓氏且为穷源竟委撰谱志记纂等书况家谱所以奠繫世辨昭穆纪生卒志塋墓其所系尤重哉我族肇始西平二十六世祖子选公同兄重九公由江右迁湘四世至式祖公分两房祖公支下又析而为四我县房祖是为明公乾隆六十年族先辈欲合而谱之以丁繁而志不一事寢迨道光庚子乃于我明房彙为支谱甲曾共董其务迄今已四十年矣当日同事大半谢世甲亦日就衰頽而族中之生者没者不知凡几古以三十年为一世故谱亦准之兹则又踰十载过此以往将年愈远丁愈增居愈散纂修亦愈难乃商之族中复为蒐辑成帙譬之作室往者既底法矣兹其肯堂肯构乎是举也虽所录仍止我房而统之以所自出使有所同而远近一别之以所自分使有所异而尊卑明庶几仁立者义以行义至者仁以尽而于先王笃本之意尚不失欤